

18 DEC 1996

Mahathir-Fujimori

PM HANTAR SURAT KEPADA FUJIMORI BERHUBUNG TEBUSAN

KUALA LUMPUR, 18 Dis (Bernama) -- Perdana Menteri Datuk Seri Dr Mahathir Mohamad hari ini menghantar sepucuk surat kepada Presiden Peru Alberto Fujimori memintanya supaya campur tangan dalam membebaskan kira-kira 200 tebusan, termasuk duta besar Malaysia, yang ditawan gerila di Lima.

"Saya sedih, cemas dan bimbang apabila mendengar mengenai kejadian di Lima itu. Memandangkan seriusnya insiden itu, saya memohon agar saudara secara peribadi dapat campur tangan untuk memastikan pembebasan kesemua tebusan.

"Saya berharap saudara akan mengambil langkah-langkah wajar dan memastikan tidak ada nyawa terkorban," katanya dalam sepucuk surat yang dibacakan oleh Menteri Luar Datuk Abdullah Ahmad Badawi pada persidangan berita di Wisma Putra di sini.

Sebelum itu, Dr Mahathir memberitahu pemberita pada satu majlis berasingan bahawa kerajaan amat bimbang mengenai insiden itu tetapi beliau percaya kerajaan Peru akan berusaha sedaya upaya dalam mengatasi masalah itu.

Tebusan itu masih ditahan di kedutaan Duta Jepun di Lima, ibu pejabat Peru.

Abdullah berkata Malaysia menyokong apa juga tindakan yang diambil oleh kerajaan Peru untuk memastikan keselamatan kesemua tebusan, termasuk duta besar Malaysia Ahmad Mokhtar Selat.

Beliau berkata kerajaan sentiasa menghubungi kedutaan Peru dan Jepun di sini untuk mendapatkan maklumat mutakhir dan mengawasi keadaan di Lima.

Abdullah berkata Ahmad Mokhtar, 48, dan tebusan lain ditahan oleh sekumpulan 30 gerila bersenjata dari Pergerakan Pembebasan Tupac Amaru.

Menurut laporan agensi berita, gerila itu telah mengancam untuk membunuh tebusan-tebusan itu melainkan kerajaan Peru membebaskan rakan-rakan seperjuangan mereka dari penjara.

Duta Malaysia itu, menurut Abdullah, ditahan di kediaman Duta Besar Jepun pada pukul 9.05 malam waktu tempatan (10.05 pagi waktu Malaysia) ketika meraikan sambutan ulangtahun Keputeraan Maharaja Jepun.

Turut ditahan ialah Menteri Luar Peru Dr Francisco Tudela, ahli-ahli politik dan beberapa duta besar negara asing.

Kesemua tahanan wanita, orang tua dan anggota-anggota Parlimen berhaluan kiri, yang jumlah mereka kira-kira 200 orang, kemudian dibebaskan. -- BERNAMA

ZAB AKD